



CONCLUSIÓN
do equipo autor deste informe

Primeira. O crecemento económico de Galicia en 2004 (3%) superou en tres décimas ao estatal e case dobrou a suba media da Unión Europea.

Por sectores produtivos, a construción (3,6%) e os servizos (3,3%) tiveron a evolución máis positiva neste primeiro Xacobeo do século XXI, mentres que a rama enerxética (0,2%) presentou a peor evolución. A industria medrou un 1,9% e o sector agro-pesqueiro un 2,3%.

Segunda. O crecemento económico galego de 2004 xerou unha suba do emprego neto que dobrou a do bienio anterior e quedou moi por riba da estatal (2,7%).

Sectorialmente, a creación de emprego neto foi especialmente importante nos servizos (22.000 persoas) e na industria (12.000 persoas), mentres que o sector agro-pesqueiro foi o único no que diminuíu a poboación ocupada (e fíxoo con menor intensidade que no cuadrienio anterior: 3.000 persoas).

Terceira. O saldo do comercio galego co estranxeiro afondou o signo negativo do ano anterior (posto que case duplicou o seu déficit comercial) e marcou o peor rexistro do último cuadrienio. A taxa de cobertura galega (92,5%), con todo, supera á estatal en 21,3 puntos e o déficit comercial galego só supón un 0,81% do total estatal.

No saldo exterior total (co estranxeiro e coas outras comunidades autónomas) Galicia é a terceira comunidade por saldo negativo absoluto (6.000 millóns de euros) e a cuarta (cun 12,55%) na porcentaxe de déficit en relación co seu PIB.

Cuarta. As inversións directas estranxeiras (IDE) en Galicia estiveron en 2004 no nivel máis baixo da última década e supuxeron tan só un 0,37% do total estatal.

Pola contra, as inversións directas de Galicia no estranxeiro foron catorce veces maiores que as IDE en Galicia en 2004 e, duplicaron as do ano anterior.

Quinta. A taxa de inflación rexistrada en Galicia en 2004 (3,3%) tivo un importante crecemento respecto do ano anterior (un punto) e quedou unha décima por riba do promedio español.

Só catro comunidades autónomas presentan unha suba dos prezos superior á de Galicia.

A inflación subxacente quedou tres décimas por baixo do IPC xeral, tanto en Galicia como no total español. Na desagregación por grupos de gasto en Galicia, os carburantes e combustibles (11,7%) tiveron a maior suba porcentual.

Sexta. O gasto de Galicia en I+D supón, no último ano dispoñible, un 4,1%, só catro centésimas máis que no ano anterior, anque, certamente, mellora –moi lixeiramente– por quinto ano consecutivo a nosa participación relativa no total do gasto estatal en I+D.

En relación ao noso PIB, o gasto galego en I+D do último ano dispoñible (0,86%) fai que Galicia ocupe o oitavo posto entre as comunidades autónomas, un 60% por baixo da media da OCDE.

Sétima. O aumento interanual do número de traballadores afiliados á Seguridade Social en 2004 é exactamente igual co ano precedente, 23.200 activos, incremento en cifras moi similares aos destes cinco últimos anos.

O aumento prodúcese no réxime xeral (2,88%) e no de autónomos (3,70%), diminuindo, pola contra, o número de cotizantes no réxime agrario (-4%) e no de traballadores do mar (-2,03%).

Oitava. Seguindo a tendencia dos últimos anos, o maior aumento de afiliados en Galicia, tanto porcentual como numericamente, prodúcese no colectivo das mulleres, situándose a media anual no 41,90% do total da poboación cotizante.

Novena. A poboación afiliada galega sitúase maioritariamente no sector servizos (60,34%), se ben, preto de cinco puntos por baixo da do conxunto do Estado.

O sector agro-pesqueiro constitúe o 10,04% dos afiliados galegos, 2,5 puntos por riba da porcentaxe estatal. Os afiliados ao sector industrial (16,97%) e da construción (12,50%) en Galicia superan en algo máis dun punto porcentual o dato estatal.

Décima. A poboación de Galicia en 2004 baixou lixeiramente, mentres que aumentou a de España en case medio millón de persoas, polo que continúa a perda de peso relativo demográfico de Galicia no conxunto do Estado. No último cuatrienio, o crecemento da poboación galega (19.085 habitantes) supuxo tan só un 0,71% da suba total española (2.697.893).

Décimo primeira. Galicia é a penúltima comunidade autónoma, por taxa de natalidade, só por diante de Asturias, e a terceira en taxa de mortalidade (por detrás de Asturias e Aragón). O efecto combinado das dúas taxas fixo que na análise do crecemento natural, Galicia sexa en 2004 a comunidade autónoma cun maior descenso poboacional en valor absoluto e a segunda en valor relativo (tras Asturias).

Décimo segunda. O crecemento da poboación activa de Galicia en 2004 (2,3%) superou en medio punto á estatal. A taxa de actividade subiu en Galicia catro décimas máis que no promedio estatal (e fíxoo cunha intensidade nas mulleres, que cuadruplicou á dos homes) polo que a diferenza, a prol de España, queda agora en 1,4 puntos.

Décimo terceira. O crecemento da taxa de ocupación galega (1,4 puntos) superou en tres décimas ao promedio español, aínda que segue nun nivel moi baixo (47,8%) en comparanza co estatal (2,5 puntos) e moito máis có contorno internacional (UE ou OCDE), moi especialmente no tocante ás mulleres (estamos, con Grecia, na cola da UE).

Décimo cuarta. Continúa unha das principais diverxencias da nosa estrutura socio-laboral, respecto da UE ou da OCDE: máis dun tercio das persoas asalariadas de Galicia teñen un contrato temporal (3,4 puntos por riba da media estatal). Nas mulleres, a taxa de temporalidade ascende ao 37,7% en Galicia (6,1 puntos por riba do promedio español).

Décimo quinta. O descenso do desemprego en Galicia en 2004 (4,9%) foi menor que o estatal (5,6%), pero supuxo un cambio positivo respecto do bienio anterior. A taxa de desemprego baixou un punto en Galicia en 2004 (dúas décimas máis que no Estado). A taxa feminina é máis do dobre que a masculina en Galicia (o que non ocorre no total español).

Décimo sexta. O número de perceptores de prestacións económicas de desemprego en 2004 incrementábase nun 6,67%; os 75.100 beneficiarios supoñen só o 5,95% do total español. As taxas neta e bruta de cobertura experimentaron un importante ascenso de 2 e 2,6 puntos, respectivamente, pero moi por baixo das medias estatais, en 10,8 e 12,8 puntos respectivamente.

Décimo sétima. A porcentaxe en Galicia da relación activos/pasivos, do Sistema da Seguridade Social, é, en 2004, de 1,42 cotizantes por pensionista. En 2004, seguindo a tendencia dos últimos anos, prodúcese, no conxunto de España, moito máis que en Galicia, un incremento significativo de cotizantes, moi por riba do incremento de pensionistas. Esta evolución deixa, sen embargo, a Galicia, moi lonxe da ratio de 2,17 do conxunto do Estado.

Décimo oitava. Agás no réxime especial agrario, que experimenta un descenso, incrementábase as cifras de empresas en alta, supoñendo globalmente un aumento do 2,6%. No Réxime Xeral da Seguridade social, o 87,14% das empresas teñen menos de 10 traballadores. O sector da construción é o que maior número de centros de traballo abre, supoñendo máis do 47% do total.

Décimo novena. A contratación presentou unha clara continuidade con respecto ao ano precedente. A temporalidade e a ascendente rotación dos empregados temporais son coñecidas características estruturais do panorama contractual e é o problema máis persistente para quen mantén contratos de duración determinada. Do total de contratos rexistrados no ano obxecto de estudo, o 91,61% da contratación é temporal, en tanto que a contratación indefinida representa o 8,39% (España 8,68%).

Vixésima. A modalidade de contratación eventual sitúase, en primeiro lugar, pasado ao segundo lugar –segundo número anual de contratos rexistrados- o contrato de obra ou servizo determinado.

Vixésimo primeira. A tradicional preponderancia dos homes na contratación, convértese en preponderancia feminina ou modérase nas modalidades contractuais de interinidade, os iniciais de fomento do emprego, os de inserción e naqueles outros contratos que se anoan ao contrato a tempo parcial.

Vixésimo segunda. Segundo a Enquisa de Conxuntura Laboral, a evolución interanual dos datos porcentuais de efectivos laborais, segundo o tipo de contrato, amosa que un 62,3% de tales efectivos manteñen un contrato indefinido, en tanto que un 37,8% vincúlanse mediante unha contratación temporal. A contratación indefinida supón un 62,2% dos efectivos laborais e perde unha décima nesta relación respecto ao ano precedente.

Vixésimo terceira. En formación ocupacional (FIP), os datos do informe 2004 ofrecen un aumento global, tanto do número de cursos 2.434 (2003: 2.417), como do número de alumnos: 40.033 (2003: 38.585), non así do orzamento, que diminúe, sendo de 52.792.521 (2003: 54.357.372) euros.

Baixan os cursos con compromiso de contratación, os cursos impartidos en centros propios e os cursos cofinanciados con FSE, mentres aumentan os cursos do Plan Autonómico de Formación de Formadores, e os cursos do plan FIP sen compromiso de contratación.

Vixésimo cuarta. O número de Empresas de Traballo Temporal estabilizouse, no último cuadrenio, despois dun crecemento. Os contratos de posta a disposición, despois dunha tendencia decrecente que se iniciara en 2001, obsérvase en 2004 novamente un incremento das cifras, supoñendo máis do 90% do total os de obra ou servizo determinado e circunstancias da produción.

Vixésimo quinta. Un ano máis, incrementouse o número de convenios colectivos vixentes en Galicia, ata chegar á cifra de 713. Dos cales, 127 son de sector e 589 de empresa.

En 2004, negociáronse por vez primeira, 36 convenios colectivos (1 de sector e 35 de empresa).

A 31 de decembro de 2004 hai 713 convenios colectivos vixentes, expresa ou tacitamente, dos cales, tan só 60 teñen un ámbito superior ao provincial (8,5%).

Vixésimo sexta. O incremento salarial dos convenios colectivos, asinados ou revisados en 2004, foi do 3,93%, superior ao IPC previsto e ao IPC real, e superior, tamén ao incremento pactado en 2003. O 54% dos convenio asinados recollen cláusula de revisión salarial afectando ao 85,5% dos traballadores.

Máis do 95% dos convenios asinados en 2004 recollen cláusulas de saúde laboral.

Tan só unha cuarta parte dos convenios asinados recollen cláusulas sobre discriminación. Do mesmo xeito, ten un carácter anecdótico, que 6 convenios recollan a distribución irregular da xornada.

Incrementábase o número de convenios colectivos que recollen cláusulas de sometemento ao AGA, ata un total de 47 convenios con esta referencia. Esta cifra, non obstante, dista moito de ser satisfactoria.

Vixésimo sétima. A sinistralidade global (con e sen baixa) incrementábase en Galicia en 2004 un 7,55% en relación coa ano anterior; contrariamente á tendencia descendente en España, que supuxo unha diminución neste ano do 6%.

O total de accidentes en xornada de traballo con baixa experimentou un aumento do 2,51%. Nos accidentes de traballo “in itinere” prodúcese un incremento do 8,05%, en relación coa ano anterior.

A actividade de construción en Galicia ocupa o primeiro lugar en número global de accidentes. En accidentes mortais, no ano 2004, destaca claramente a pesca.

Vixésimo oitava. Os traballadores con contrato temporal véñse afectados por accidentes de traballo en maior medida que os de contrato indefinido, con case o 56% dos producidos cando supoñen o 34% da poboación asalariada.

Vixésimo novena. Prodúcese un descenso dos accidentes mortais en Galicia que supuxo globalmente unha diminución do 2,36%, reflectíndose sensiblemente en todas as provincias menos en Pontevedra e salientando o importante descenso experimentado na provincia de Ourense. Os accidentes graves con baixa incrementáronse en Galicia en 2004 un 7,5%.

Tríxésima. No que se refire ao índice de incidencia (relación accidentes/poboación asalariada), Galicia, no total de accidentes, está cerca de 6 puntos por baixo do índice nacional, tendo seis comunidades autónomas menor índice. Referido a accidentes mortais, Galicia ocupa o cuarto lugar, cun índice que está máis de 3 puntos por riba da media estatal.

Tríxésimo primeira. Na conflitividade en Galicia, pódese observar que, se ben houbo unha tendencia decrecente en folgas provinciais, a cifra é en 2004 superior á do ano 2003, e, aínda que se observa un descenso nos días de folga, prodúcese un incremento dos traballadores participantes e as xornadas non traballadas.

Tríxésimo segunda. Analizando os resultados dos procesos electorais en Galicia durante o último período de catro anos e, tendo en conta os representantes con mandato en vigor a 31 de decembro de 2004, a central sindical UGT, co 32,12% do total, é a que obtivo maior número de representantes, seguida de CCOO e CIG con 30,13% e 26,21%, respectivamente.